



册府元龜

卷之七百二十四
至二十六



13
849
237



門 1 3
第 849
本 237



幕府元龜

淮南李嗣京參閱

西極文翔鳳訂正

豫章黃國琦較釋

幕府部

九

武功

士之結髮筮仕委質從政。參預幕畫列于丞佐。又豈
只樽俎刀筆之用而已哉。乃有內懷義勇兼資英槩
因冠鈔之竊發。或夷蠻之內侮。而能率勵驍果挺身
進擊。冒刃轉鬪。劫質靡顧。臨機制變。殲厥醜類。以至

追討亡叛乘危轉禍叅從征伐分部四方或逆黨侵逼奸謀中造驅攘摧敗先期翦滅堅壁固守保完城堞集茲茂伐載之策府繇東漢而下咸可述焉

後漢孔奮爲武都郡丞時隴西餘賊隗茂等夜攻府舍殘殺郡守賊畏奮追擊之執其妻子欲以爲質奮年已五十唯有一子終不顧望遂窮力討之吏民感義莫不信用命焉郡多氐人便習山谷其大豪齊鍾留者爲郡氏所信向奮乃率勵鍾留等令要遮鈔擊其爲表裏賊窘懼逼急乃推奮妻子以置軍前冀當退却而擊之愈勵遂擒滅茂等奮妻子亦爲所殺光

武下詔褒美拜爲武都太守

楊竦爲益州刺史張喬從事元初五年越雋夷叛詔喬選堪能從事討之喬乃遣竦將兵至標榆擊之賊盛禾敢進先以詔書告示二郡密徵求武事重其購賞乃進軍與封離級等戰大破之斬首三萬級獲生口千五百人資財四千餘萬悉以賞軍士封離級等惶怖斬其同謀渠帥詣竦乞降竦厚加慰納其餘三十六種皆來降附竦等因奏長吏奸猾侵犯蠻夷者九十人皆滅死州中論功未及上會竦病創卒張喬深痛惜之乃刻石勒銘圖畫其像

董卓爲涼州從事胡嘗出鈔多虜民人刺史成就使卓領兵騎討捕大破之斬獲千計

魏龐德字令明南安狷道人也少爲郡吏州從事漢初平中從馬騰擊反羌叛氏數有功稍遷至較尉呂虔爲太祖兗州從事將家兵守湖陸襄陵較尉杜松部民晁毋等作亂與昌豨通太祖以虔代松虔到招誘晁毋渠率及同惡數十人賜酒食簡壯士伏其側虔察晁毋等皆醉使伏兵盡格殺之撫其餘衆羣賊乃平

田豫爲鄆陵侯彰相彰征代郡軍次易北虜伏騎擊之軍人擾亂莫知所爲豫因地形圓車結圍陣弓弩持滿於內疑兵塞其隙胡不能進散去追擊大破之遂前平伐皆豫策也

蜀張嶷巴西郡人州召爲從事會廣漢綿竹山賊張慕等鈔盜軍資劫掠吏民嶷以都尉將兵討之嶷度其鳥散難以戰擒乃詐與和親尅期置酒酒酣嶷身率左右因斬慕等五十餘級渠帥悉珍尋其餘類旬

日清泰

吳朱治字君理丹陽故鄣人爲孫堅司馬從討長沙零桂等三郡賊周朝蘇馬等有功堅表治行都尉

晉羊琇少舉郡計叅鎮西鍾會軍事從平蜀還賜爵
關內侯
劉喬為王戎建威將軍叅軍事伐吳之役戎使喬與
叅軍羅尚濟江破武昌還授滎陽令
紀瞻為元帝鎮東長史以討周馥功封都鄉侯遷丞
相軍諮叅酒以討陳敏功封臨湘侯
陶侃為劉弘寧朔將軍司馬會張昌妖亂破武昌攻
宛及襄陽江楊跨帶五州詔弘鎮宛弘遣侃與叅軍
蒯桓皮初等率衆討昌於竟陵劉喬又遣將軍李陽
督護尹奉總兵向江夏侃等與昌苦戰累日大破之

納降萬計昌乃流竄于下雋山明年秋乃擒之傳首

京師

褚裒為吳王功文學蘇峻之逆車騎將軍郗鑒以裒
為叅軍峻平以功封都鄉亭侯

毛穆之為安西將軍庾翼司馬翼薨大將于璜戴羲
等作亂穆之與安西長史江霖司馬朱濤等共平之
桓溫伐蜀復取為叅軍從溫平蜀
孫盛為桓溫叅軍與溫俱伐蜀軍次彭模溫自以輕
兵入蜀盛領羸老輜重在後賊數千忽至衆皆違邊
盛部分諸將并力距之應時敗走蜀平賜爵安懷縣

侯累遷溫從事中郎從入關平雒以功封吳昌縣侯
劉牢之爲謝玄參軍會苻堅將句難南侵玄率何謙
等拒之牢之破難輜重於盱眙獲其運船
毛璩爲譙王恬司馬海陵縣界地名青蒲四面湖澤
皆是菰葑逃亡所聚威令不能及璩建議率千人討
之時大旱璩因放火菰葑盡然亡戶窘迫悉出詣璩
自首近有萬戶皆以補兵朝廷嘉之

宋劉敬宣初仕晉爲後將軍元顯諮議參軍孫恩爲
亂東土騷擾敬宣父牢之自表東討軍次虎驟賊皆
死戰敬宣請以騎傍南山趣其後吳賊畏焉又懼首

尾受敵遂大敗進平會稽尋加臨淮太守遷後將軍
從事中郎後爲高祖中軍諮議參軍高祖伐鮮卑敬
宣從至臨朐慕容超出軍拒戰敬宣與兗州刺史劉
藩等奮擊大破之龍驤將軍孟龍符戰沒敬宣并領
其衆圍廣固屢獻規略

朱齡石爲高祖參軍盧循之逼京師齡石率勁勇千
餘人過淮群賊數千皆長刀矛鋌精甲曜日奮力爭
進齡石所領多鮮卑善步稍並結陣以待之賊短兵
弗能抗死傷者數百人乃退走會日暮衆亦歸
朱超石爲高祖大尉中兵參軍義熙十二年高祖北

伐超石前鋒入河魏主姚興之婿也遣弟黃門郎鵠
青冀州刺史安平公乙旃眷襄州刺史拓拔道生青
州刺史阿薄干步騎十萬屯河北嘗有數千騎綠河
隨大軍進止時軍人綠河南岸牽百丈河流迅急有
漂渡北岸者輒爲魏軍所殺略遣軍纔過岸魏軍便
退走軍還即復東來高祖乃遣白直隊主丁旡率七
百人及車百乘河北岸上去水百餘步爲却月陣兩
頭抱河車置七仗士事畢使豎一長白旡魏軍見數
百人步牽車上不解其意竝未動高祖先命超石戒
嚴白旡旣舉超石馳往赴之并齊大弩百張一車益

二十人設鼓排於轅上魏軍見營陣旣立乃進圖營
超石先以軟弓小箭射虜虜以衆少兵弱四面俱至
魏主又遣南平公長孫嵩三萬騎至遂內薄攻營於
是百弩俱發又選善射者藁箭射之魏軍旣多弩不
能制超石初行別齎大鎚并千餘張稍乃斷稍長三
四尺以鎚鎚之一稍輒洞貫三四人魏軍不能當一
時奔潰臨陣斬阿薄干首虜退還平城超石率胡蕃
斬劉榮祖等追之復爲虜所圍奮擊盡日殺虜千計
虜乃退走高祖又遣振武將軍徐猗之五千人向越
騎城虜圍猗之以長戟結陣超石赴之未至悉奔走

大軍進尅蒲坂以超石爲河東太守戍之

蒯恩爲高祖大尉長史領衆二千隨益州刺史朱齡石伐蜀至彭模恩所領居前大戰自朝至日旰勇氣益奮賊破走進平成都擢爲行叅軍恩自從征討每有危急輒率先諸將嘗陷堅破陣不避艱險凡百餘戰身被重瘡

劉懷慎爲高祖鎮軍叅軍從征鮮卑每戰必身先士卒及尅廣固懷慎率所領先登從高祖拒盧循於石頭屢戰克捷

向彌爲高祖鎮軍叅軍從征鮮卑大敗於臨朐累日

不決彌與檀韶等分軍自間道攻臨朐城彌擐甲先

登卽時間潰斬其牙旗賊遂奔走攻拔廣固彌又先

登

孟龍符爲高祖建武叅軍江乘羅落覆舟三戰並有

功叅鎮軍事封平昌縣五等子

劉穆之爲高祖主簿以平桓玄功封西華縣五等子

王鎮惡爲高祖前部賊曹拒盧循於查浦屢戰有功

高祖討劉毅鎮惡叅軍事襲毅於江陵未至五六里

毅將朱顯之覺之馳去告毅行令閉諸城門鎮惡亦

馳進軍人緣城得入門猶未及下關因得開大城東

門大城內毅凡有八隊帶甲千餘已得戒嚴蒯恩入東門便北廻擊射堂前攻金城東門鎮惡入東門便直擊金城西門軍分攻金城內東從舊將猶有六隊千餘人西將及能細直吏快手復有二千餘人食時就鬪至中晡西人退散及歸降畧盡鎮惡入城便因風放火燒大城南門及東門又遣人以詔及赦文并高祖手書凡三函示毅毅皆燒不視全城內亦未信高祖自來有王桓者家在江陵昔手斬桓謙爲高祖所賞拔嘗在左右求還西迎家至是率十餘人助鎮惡戰下晡間於金城東門北三十步鑿城作一穴桓

便先衆入穴鎮惡自後繼之隨者稍多因短兵接戰鎮惡軍人與毅東將或有是父兄弟中表親者鎮惡令且鬪且共語衆并知高祖自來人情離懈一更許聽事前陣散潰斬毅勇將趙蔡毅左右兵猶閉東西閣拒戰鎮惡慮闇夜自相傷犯乃引軍出繞金城開其南面以爲退路毅慮南有伏兵三更中率左右三百許人開北門突出初毅嘗所乘馬在城外不得入倉卒無馬毅便執子肅民取馬肅民不與朱顯之謂曰人取汝父而惜馬不與汝今自走欲何之奪馬以授毅初出正值鎮惡軍鬪之不得去廻衝蒯恩軍

軍人鬪已一日疲倦殺得從大城東門出奔牛牧佛寺自縊死鎮惡身被五箭射鎮惡手所執稍于手中破折江陵平後二日大軍方至署中兵出爲安遠護軍武陵內史以討劉毅功封漢壽縣子食邑五百戶王仲德爲嵩祖中兵叅軍高祖伐廣固仲德爲前鋒大小二十餘戰輒尅及盧循逼京師以仲德屯越城賊自蔡州南走遣仲德追之賊留親黨范崇民五千人高艦百餘戍南陵仲德攻之大破崇民焚其舟艦收其散卒功冠諸將封新塗縣侯

屢有戰功

劉懷肅晉末爲劉敬宣寧朔府司馬東征孫恩有戰功振武將軍長沙王道規追桓玄以懷肅爲司馬玄留何澹之郭銓等戍桑落州進擊破之潁川太守劉統平除高平太守玄旣死從子振大破義軍於楊林義軍退尋陽懷肅與江夏相張暢之攻澹之於西塞破之僞鎮東將軍馮該戍夏口東岸孟山圖據魯山城桓仙客守月壘皆連壁相望懷肅與道規攻之躬擐甲胄陷二城馮該走石城生擒仙客義熙元年正月振敗走道規遣懷肅平石城斬馮該及其子山靖

三月桓振復襲江陵荊州刺史司馬休之出奔懷肅自雲杜馳赴晝夜兼行七日而至振勒兵三萬旗幟蔽野躍馬橫矛躬自突陣流矢傷懷肅額衆懼欲奔懷肅瞋目奮戈膽氣益壯於是士卒爭先臨陣斬振首江陵既平休之反鎮執懷肅手曰微子之力吾無所歸矣僞輔國將軍符司馬孫僞龍驤將軍金符靚樂志等屯結中夏懷肅又討之梟樂志等道規加懷肅督江夏九郡權鎮夏口

沈叔任晉末爲朱齡石伐蜀司馬齡石遣叔任戍涪蜀人侯產德作亂攻涪城叔任擊破之斬產德

胡藩爲高祖太尉叅軍統別軍至河東暴風漂藩重艦渡北岸魏軍牽得此艦取其器物藩氣厲心憤率左右十二人乘小船徑往河北賊騎五六百見藩來竄笑之藩素善射登岸射賊應弦而倒者十許人賊皆奔退悉收所失而反又與朱超石等擊姚業於蒲坂超石失利退還藩收超石所捨資實徐行而反業不敢追

陸仲元爲長沙王道憐司馬道憐自京口入朝仲元居守時刀達子彌爲亡命刀姓彌名率數十人入京城仲元擊斬之

裴方明爲劉道濟振武中兵叅軍立功蜀土

柳元景爲南雍州刺史竟陵王誕中兵叅軍元嘉末文帝欲大舉北討以襄陽外接關河欲廣其資力乃罷江州軍府文武悉配雍州湘州入臺稅租雜物悉給襄陽及大舉北伐命諸蕃並出師莫不奔敗唯元景先克弘農關陝三城多獲首級

劉亮爲巴陵王休若鎮東中兵叅軍北伐南討功冠諸將封順陽侯食邑六百戶
張興世竟陵人白衣隨王玄謨伐蠻每戰輒有擒獲玄謨舊郢曲諸將不及其奇之還都白文帝稱其膽

力後隨孝武鎮尋陽以補南中叅軍督護入討元凶

劭

柳元景爲前鋒事定轉員外將軍領從隊南郡王義宣反又隨玄謨出梁山有戰功除建平王宏中軍行叅軍領長刀

劉康祖爲南平王鐸安蠻府司馬元嘉末後魏太武親率大衆攻圍汝南文帝遣諸軍救援康祖總統爲前驅軍次新蔡與魏軍戰俱前百餘里濟融水魏衆大至奮擊破之斬其殿中尚書任城公乞地真去懸瓠四十里太武燒營退走轉左軍將軍

焦度為青州刺史顏師伯輔國叅軍魏遣清水公捨
賁勅文寇清口度領軍救援刺魏騎將豹皮公墮馬
獲其具裝鎧稍手殺數十人

劉俊為劉延孫南徐州從事隨父司空勔征竟陵王
誕以功拜駙馬都尉轉宗殿寧蠻府主簿建安王司
徒騎兵叅軍復隨父勔征殷琰於壽春累戰皆勝

沈敞之為趙倫之征虜叅軍監南陽郡擊蠻有功遂
即真

沈攸之元嘉二十九年征西陽蠻始補隊王巴口建
義南中郎府板長史兼行叅軍新亭之戰身被重創

事寧為大尉行叅軍封平雒縣五等侯又隨沈慶之
征廣陵屢有功被箭破骨孝武以其善戰配以仇池

步稍

南齊劉懷瑜平原人宋文帝時本州辟主簿時亡命
司馬順則聚黨東揚州遣懷瑜數千人掩討平之

梁李昶為交州長史天興四年刺史李凱據州反昶
討平之

蕭昂為廣州長史時司空王茂子貞秀有罪留廣州
乃潛結仁威府中兵叅軍杜景欲襲州城昂討之景
與貞秀同戮

荀朗為廬陵王府叅軍侯景之亂朗招率徒旅據巢湖聞無所屬臺城陷後簡文帝密詔授朗雲麾將軍豫州刺史令與外藩討景景使儀同宋子仙任約等頻徃征之朗據山立寨自守子仙不能尅時京師大饑百姓皆於江外就食朗更招致部曲解衣推食以相賑贍衆至數萬人侯景助於巴陵朗出自濡須截景破其後軍

後梁尹正為宣帝雍州中兵叅軍擒張纘獲杜岸皆正之力

陳侯安都初為梁始興內史蕭子範主簿侯景之亂

招集兵甲至三千人高祖援京邑安都引從高祖攻蔡路養破李遷仕尅平侯景並力戰有功元帝授益烈將軍通直散騎嘗侍富川縣子邑三百戶

侯瑱巴西人事益州刺史蕭子範委以將帥之任山谷夷獠不賓附者並遣瑱征之累功授輕車府中兵叅軍

後魏崔敬邕為中山王英南討都督府長史以功賜爵臨淄男

楊侃為叔稽雍州錄事叅軍帶長安令北地功曹毛洪賓據郡引寇抄掠渭北侃啓自出討之遂購募戰

士信宿之間得三千餘人御杖夜進至馮翊郡西賊見大軍卒至衆情離解洪賓遂通書送質乞求自効于是擒送

鹿念爲彭城王邵司馬先是梁武遣將彭城郡王辯率衆七萬圍逼琅邪自春及秋官軍不至而兩青士馬裁可萬餘師次鄆城久而未進邵乃遣念南青州刺史胡平遣長史劉仁之并監勒諸將徑赴賊壘大破之斬首俘馘二千餘級孝明嘉之璽書勞問

王嘗伽爲行豫州事堯雄外兵叅軍雄隨行臺任延敬討賀若徽于潁州延敬等失利雄收集散卒保大

梁周文帝因延敬之敗遣其右丞韋孝寬等攻豫州雄都督郭丞伯程多寶等舉豫州降敵執刺史馮邕并家屬及部下妻子數千口欲送之長安至樂口嘗伽與都督赫連雋等數十騎從大梁邀之斬多寶拔雄等家口還大梁

北齊尉興敬爲嘗山公府叅軍晉州民李小興羣聚爲賊興敬隨司空韓軌討平之
封隆之爲汝南王悅中兵叅軍後魏延昌中道人法慶作亂冀方自號大乘衆五萬餘遣大都督元暹及隆之擒獲法慶賜爵武城子

張晏之字熙德高岳征潁川以晏之爲都督中兵參軍兼記室晏之文士兼有武幹每與岳帷帳之謀又嘗以短兵接刃親獲首級泝爲岳所嗟賞後周呂思禮初仕魏爲相州功曹參軍葛榮圍鄴思禮有守禦勲賜爵平陸縣伯藥城令王子直初仕後魏爲大尉參軍時梁人圍壽春臨淮王元彧率軍赴援子直以本官參彧軍事與梁人戰斬其軍主夏侯景超梁人乃退淮南民庶因兵寇之後猶聚爲盜彧令子直招撫之咸來復崇自合肥以北安堵如舊

于謹初仕後魏爲行臺僕射元纂鎧曹從事纂令謹率二千騎追茹茹前後十七戰盡降其衆

令狐整初仕魏爲東陽王元榮主簿及鄧彥竊據瓜州拒不受代整與開府張穆等密應使者申徽執彥送京師太祖嘉其忠節表爲都督

王悅爲太祖相府刑獄叅軍東魏將侯景攻圍雒陽太祖赴援悅又率鄉里千餘人從軍至雒陽將戰夕悅罄其行資市牛饗戰士悅所部盡力斬獲居多遷大行臺右丞

伊婁穆爲衛公直襄州長史郢州城民王道胥反襲

陷州城直遣穆率百餘騎馳往援之穆至城下頻破道胥衆會大將軍高琳率衆軍繼進道胥等乃降唐州山蠻恃險逆命穆率軍討之蠻酋等保據石窟一十四處穆分軍進討旬有四日并破之虜獲六千五百人

隋趙賢通初爲周太祖相府叅軍從事破雒陽及太祖班師賢通請留撫納亡叛太祖從之於是帥所領與齊人前後五戰斬郡守鎮將縣令五人虜獲甚衆以功封平定縣男邑三百戶
柳旦初仕後周爲兵部下大夫頃之益州總管王謙

起逆拜爲行軍長史從梁睿討平之以功授儀同三

司

令狐熙爲司徒左長史時吐谷渾寇邊以行軍長史從元帥元諧討之以功進位上開府

盧毓字道生少英果有氣節漢王諒出鎮并州毓以妃兄爲王府主簿從趙仲卿北征突厥以功授儀同

三司

劉弘開皇初爲齊州長史志在立功不安佐職平陳之役表請從軍以行軍長史從總管吐萬緒渡江以功加上儀同封濩澤縣公

段文振開皇初以行軍長史從達奚震討蠻平之加
上開府

王仁恭爲驃騎將軍典蜀王軍事山獠作亂蜀王命
仁恭討破之賜奴婢三百口

張須陁大業中爲齊郡丞賊帥裴長才石子河等衆
二萬奄至城下縱兵大掠須陁未暇集兵親率五騎
戰賊競赴之圍百餘重身中數瘡勇氣彌厲會城中
兵至賊稍却須陁督軍復戰長才敗走

唐高士廉隋末爲交趾太守丘和司法書佐欽州俚
帥審長真衆率攻和和欲出門迎之廉進說曰長真
兵勢雖多懸軍遠至內離外蹙不能持久且城中勝
兵足以當之奈何而欲受人所制和從之因命士廉
爲軍司馬水陸俱進逆擊破之長真僅以身免餘衆
盡降

竇軌字士則扶風人隋末爲資陽郡東曹掾去官歸
于家高祖義兵起以爲大丞相諮議叅軍時稽胡賊
五萬餘人掠宜君命軌討之行次黃欽山與賊相遇
賊乘高縱矢王師稍却軌斬其部將十四人拔隊中
小帥以代之軌自率數百騎殿于軍後令之曰聞鼓
聲有不進者自後斬之旣鼓士卒爭死皆登山赴敵

賊射之不能止因大破之斬首千餘級虜男女二萬
口
唐休璟爲營府戶曹調露中單于突厥背叛誘扇奚
契丹侵掠州縣其後奚渴胡又與桑乾突厥同反都
督周道務遣休璟將兵擊破之于獨護山斬獲甚衆
超拜豐州司馬

伊慎大曆中爲江州別駕以西江牙軍從李希烈討
梁崇義慎摧鋒陷敵功居多希烈意欲廢之慎以計
逆歸曹王臯希烈懼慎爲曹王所任遣慎七屬之甲
許爲慎書行間焉德宗遣中使卽軍以詰之曹王乃

抗疏論雪上章未報會賊兵泝江來寇曹王乃召慎
勉之令戰大破三千餘衆朝廷始信其不貳累拔蔡
山柵取蘄州降其將李良又攻黃梅縣殺賊將韓霜
露斬首千餘級優詔褒異授試太子詹事

韋萬爲福建從事貞元四年福建叛卒逐其觀察使
吳誥誥奔建州而叛兵四百餘人潰亡入海延至溫
台明州寇掠鄉閭頗爲人患德宗憂其滋長令中使
皇甫政設策備之政乃令萬巡撫二州擇海浦形便
起城柵修艦教弩選豪士者爲統將以招討之萬有
方略數月之間殺獲頗衆餘悉降之自是瀕海皆寧

萬及將吏各加官賜帛有差

劉昌喬為許州節度留後上官浚判官貞元十五年吳少誠攻許州日夕攻急堞壞不得修昌喬令造鐵棚木柵以待募壯士斫營得突將千人鑿城分出大破之固立戰棚木柵于城上以故不陷兵馬使安國寧與浚不善謀反以城降賊李洎昌喬密討斬之即召其麾下千餘人就食之人賞緜兩疋伏兵于委巷令見持緜者悉斬之無一人得脫十六年以全陳許功以浚為節度使昌喬為陳州刺史

任廸簡為左庶子及張茂昭去易定以廸簡為行軍司馬既至屬虞侯楊伯玉以府城叛俄而眾殺之將納廸簡兵馬使張佐元又叛廸簡攻殺之乃得入加簡較工部尚書克節度觀察使

鄭權為涇原節度使劉昌從事昌病亟請入覲度軍中必有變以權寬厚善容眾俾主留務既而兵果為亂權挺身於白刃中抗詞以明逆順因殺其首亂者數人士卒皆戢伏時德宗厭言兵藩鎮將吏得人心者多超授官爵於是自試衛佐擢為行軍司馬兼御史中

王棲曜為嘗州別駕時江左兵荒詔內嘗侍馬日新

領汴滑五千人鎮之日新貪暴賊蕭庭蘭乘人怨訴逐之而劫其衆時棲曜遊奕遠郊遂爲賊所脅進圍蘇州棲曜因其怠懈挺身登城率城中出攻賊衆大潰

衡方厚爲邕管館驛巡官前試左衛兵曹參軍太和五年五月方厚狀奏去年冬本使差入谿洞招諭賊帥黃承祖部領至府本使已薦論伏乞准容管告捷官例處分授邕州錄事參軍

後唐任圜爲潞州觀察判官莊宗以上黨之師攻嘗山城中萬人突出大將孫文進死之賊逼王師圜麾騎士擊之頗有殺獲嘗以禍福諭其城中鎮人信之使人乞降

淮南李嗣京奏聞

淳于晏爲霍彥威徐州從事同光末彥威從明宗入魏州監軍使謀害彥威家屬及所留部曲欲據城拒命晏率部將先殺之天成初彥威授平盧軍節度使以晏爲副使

晉吳巒爲沙彥珣從事累遷大同軍節度判官高祖建號契丹之援大原也彥珣據雲中二三顧望及契丹還塞彥珣出城迎謁尋爲所虜時巒在城中謂其衆曰豈有禮義之人而臣于夷狄乎即與雲州將吏

關門拒守契丹大怒攻之半歲不能下高祖致書于
契丹乃解圍而去召密歸闕授徐州節度副使

冊府元龜

淮南李嗣京叅閱

西極文翔鳳訂正

豫章黃國琦較釋

幕府部

十

盡忠

夫委質事人有死無貳烈士之節也繇漢而下公府
方面咸得聘署以至丞掾之選率多英豪乃有當艱
虞之際盡忠貞之效亢直以禦侮奔走以赴難盡力
於救惡而忘其楚毒悉心於濟難而安乎廝役勵節

以固守蹈刃而無悔以至規諫之不聽死以為謝事
勢之既去義不改圖追懷恩紀其就鼎鑊斯固英風
激於頽俗茂烈著於信史千載之下凜乎其有生氣
矣

後漢周榮辟司徒袁安府安數與論議甚器之及安
舉奏竇景與竇憲爭立北單于事皆榮所具草竇氏
客太尉掾徐龔深惡之脅榮曰子為袁公腹心之謀
掛奏竇氏竇氏悍士刺客滿城中謹備之矣榮曰榮
江淮孤生蒙先帝大恩以歷宰二城今復得備宰士
榮辟司徒府
故稱宰士
縱為竇氏所害誠所甘心故嘗勅妻子

若卒遇飛禍無得殞歛

飛禍言倉卒而死也

冀以區區腐身覺

悟朝廷及竇氏敗榮繇此顯名

袁祕汝南汝陽人為郡門下議生黃巾起祕從太守
趙謙擊之軍敗祕與功曹封觀主簿陳端門下督范
仲禮賊曹劉偉德主記史丁子嗣記室史張仲然等
七人以身扞刃皆死於陣謙以得免詔祕等旌表門
閭號曰七賢

耿武為韓馥冀州長史袁紹至馥從事十人棄馥去
唯恐在後獨武與別駕閔純杖刀兵不能禁紹後令
田豐殺此二人

鮮于輔漢末為幽州牧劉虞從事時公孫瓚既殺劉
虞輔以燕國閭柔有恩信共推柔為烏丸司馬及瓚
敗死輔持其眾奉王命以輔為建忠將軍督幽州六
郡太祖與袁紹相拒於官渡閭柔遣使詣太祖受事
遷護烏丸較尉而輔身詣太祖拜左渡遼將軍封亭
侯遣還鎮撫本州

祖授為袁紹冀州別駕官渡之敗授為曹公軍所執
乃大呼曰授不降也為所執爾曹公見授謂曰分野
殊異遂用起絕不圖今日乃得相見授對曰冀州失
策自取奔北授智力俱困宜其見禽曹公曰本初無

謀不相用計今喪亂過紀國家未定

十二年

方當與

若圖之授曰叔父母弟懸命袁氏若蒙公靈速死為
福曹公歎曰孤早相得天下不足慮也遂赦而厚遇
焉授尋謀歸袁氏乃誅之
魏賈逵為太祖丞相主簿太祖欲伐吳而大霖雨三
軍多不願行太祖知其然恐外有諫者教曰今孤戒
嚴未知所之有諫者死逵受教謂其同僚三主簿曰
今實不可出而教如此不可不諫也乃建諫草以示
三人三人不獲已皆署名入白事太祖大怒收逵等
當送獄取造意者逵即言我造意遂去詣獄獄吏以

達主簿也不即著械謂獄吏曰促械我尊者且疑我在近職求緩於卿今將遣人來察我達著械適訖而太祖果遣家中人就獄視達既而教曰達無惡意原復其職

魯芝為大將軍曹爽司馬爽將誅芝與主簿楊綜斬關奔爽及爽之將歸罪也芝綜泣諫曰公居伊周之任挾天子杖天威孰敢不從舍此而欲就東市豈不痛哉一云公挾天子權捨此以至東市乎爽不從有司奏收芝綜科罪司馬宣王赦之曰以勸事君者

龐清為涼州從事守破羌長會武威太守張猛反殺

刺史邯鄲商清號哭尸所猛兵欲來縛清猛聞之歎曰猛以殺刺史為罪此人以至忠為名如又殺之何以勸一州履義之士邪遂使行服

蜀黃權為益州牧劉璋主簿璋欲迎先主權諫不聽出為廣漢長及先主襲取益州將帥分下郡縣望風景附權閉城堅守須劉璋稽服乃詣降先主先主假權偏將軍

吳虞翻為孫策功曹時策討山越斬其渠帥悉令左右分行逐賊獨騎與翻相得山中翻問左右安在策曰悉行逐賊翻曰危事也令策下馬此草深卒有驚

急馬不及縈策但牽之執弓矢以步翻善用矛請在
前行得平地勸策乘馬策曰卿無馬奈何荅曰翻能
步行日可三百里自征討以來吏卒無及翻者明府
試躍馬翻能躡步隨之行及大道得一鼓吏策取角
自鳴之部曲讖聲小大皆出遂從周旋平定三郡策
薨權統事定武中郎將嵩策之從兄也屯烏程整帥
吏士欲取會稽會稽聞之使民守城以俟嗣主之命
因令人告諭嵩翻說嵩曰討逆明府不竟天年今攝
事統衆宜在孝廉翻已與一郡吏士嬰城固守必欲
出一旦之命爲孝廉除害惟執事圖之於是嵩退

晉郭瑀敦煌人苻氏之末爲雒陽王穆太府左長史
穆惑於讒間西伐敦煌索嘏瑀諫曰昔漢定天下然
後誅功臣今事業未建而誅之立見麋鹿游於此庭
矣穆不從瑀出城大哭舉手謝城曰吾不復見汝矣
還而引被覆面不與人言不食七日輿疾而歸旦夕
祈死

郭舒爲荊州刺史王澄別駕澄終日酣飲不以衆務
在意舒嘗切諫之及天下大亂又勸澄修德養威保
完州境澄以爲亂自京都起非復一州所能防禦雖
不能從然重其忠亮荆土士人宗欽嘗因酒忤澄澄

怒叱左右捧欵舒厲色謂左右曰使君過醉汝輩何敢妄動澄恚曰別駕狂邪誑言我醉因遣搯其鼻炙其眉頭舒頷而受之澄意少釋而欵遂得免
桓雄長沙人少仕州郡譙王承為湘州刺史命為主簿王敦之逆承為敦將魏乂所執佐吏奔散雄與西曹韓階從事武延竝毀服為僮豎隨承向武昌乂見雄姿貌長者進退有禮知非凡人有畏憚之色因害之

謝純字景懋晉末為劉毅豫州別駕毅鎮江陵以為衛軍長史南平相高祖遣王鎮惡率軍襲毅已至城

下時毅疾病佐吏皆入參承純參承畢已出聞兵至馳還入府左右引車欲還外廨純叱之曰我入吏也逃欲安之乃入及毅兵敗眾散時已暗夜司馬毛修之謂純曰君但隨僕純不從挾兩人出火光中為人所殺

韓延之為平西將軍荊州刺史司馬休之平西府錄事參軍休之以子文思為宋高祖所殺遂結雍州刺史魯宗之謀誅執政高祖討之未至江陵密使與延之書曰文思事源遠近所知去秋遣康之送還司馬君者推至公之極也而了無愧心又絕表覬此是天

地之不容吾受命西討止其父子而已彼土僑舊爲所驅逼一無所問往年郗僧施謝邵任集之等交構積歲專爲劉毅謀主所以至此卿等諸人一時逼迫本無纖釁吾虛懷期物自有繇來今在近路正是諸人歸身之日若大軍先登交鋒接刃蘭艾雜揉或恐不分故自此意并可示同懷諸人延之報曰承親率戎馬遠履西畿闔境士庶莫不驚駭何者莫知師出之名故也今辱來疏始知以譙王前事良增歎息司馬平西躰國忠貞欵愛待物當於古人中求爾以君公有興復之勲家國蒙賴推德委誠每事詢仰譙王

往以微事見劾猶自表遜位况以大過而當嘿然邪但康之前言有所不盡故重使胡道諮自所懷道未及反已奏表廢之所不盡者命爾推寄相與之懷正當如此有何不可便興兵戈自義旗秉權以來四方伯誰敢不先相諮疇而徑表天子可謂欲加之罪其無辭乎劉裕足下海內之人誰不見足下此心而復欲欺誑國士天地所不容在彼不在此矣來言虛懷期物自有繇來今伐人之君陷人以利真可謂虛懷期物自有繇來者矣劉藩死於閭闔之門諸葛斃於左右之手其言詫方伯襲之以輕兵遂使席上靡

款懷之士聞外無自信諸侯以是爲得筭良可耻也
貴府將佐及朝廷賢德寄性命以過日心企太平久
矣吾誠鄙劣嘗聞道於君子以平西之至德寧可無
授命之臣乎未能自投虎口比迹郗任之徒明矣假
令天長喪亂九流渾濁當與臧洪遊於地下不復多
言公視書歎息以示諸佐曰事人當使如此
宋劉穆之爲高祖司馬食必方丈嘗爲十人饌穆之
嘗謂高祖曰穆之家本貧贍生多闕自叨忝以來雖
每存納損而朝夕所須微爲過豐自此之外一毫不
以負公

胡藩初爲荊州刺史殷仲堪叅軍嘗說仲堪以崇待
桓玄太過後叅玄軍事玄敗高祖素聞藩直言於殷
氏又爲玄盡節召爲員外散騎侍郎叅鎮軍事

謝方明爲高祖中兵主簿方明事思忠益知無不爲
高祖謂之曰愧未有瓜衍之賞且當與卿共豫章國
祿屢加賞賜

賀弼爲竟陵王誕記室叅軍孝武將誅誕誕閉城拒
弼固諫再三誕怒抽刀向之乃止或勸弼出降弼曰
公舉兵向朝廷此事旣不可從荷公厚恩又義無違
背唯當死明心爾乃服藥自殺

邊榮爲沈攸之荊州倉曹參軍嘗爲府錄事所辱攸
之爲榮鞭殺錄事及攸之自江陵下以榮爲留府司
馬守城張敬兒將至人或說之使詣敬兒降榮曰受
沈公厚恩一朝緩急便改易本心不能也城敗見敬
兒問曰邊公何爲同人作賊不早來榮曰沈荊州舉
義兵安社稷身雖可滅要是宋世忠臣天下尚有直
言之士不可謂之爲賊身本不斬生何須見問敬兒
曰死何難命斬之榮歡笑而去容無異色
臧寅爲沈攸之功曹攸之兵敗諸將軍皆奔散唯寅
曰我委質事人豈可苟免乃投水死

宗儼之爲沈攸之記室攸之抗齊太祖表檄文疏皆
儼之辭也及事敗責之荅曰士爲知己用豈爲軍輩
所識遂伏誅

南齊房叔安爲青州刺史王玄邈長史齊高帝之鎮
淮陰爲宋明帝所疑乃北勸魏遣書結玄邈叔安進
曰夫布衣韋帶之士御一食而不忘義使之然也今
將軍居方州之重托君臣之義無故舉忠孝而棄之
三齊之士寧蹈東海死爾不敢隨將軍也玄邈意乃
定仍使叔安使建業發高帝謀高帝於路執之并求
玄邈表叔安荅曰寡君使表上天子不上將軍且僕

之所言利國家而不利將軍無所應問荀伯玉勸殺之高帝曰物各爲主無所責也

鄭紹叔爲壽州治中從事時刺史蕭誕以弟謀誅臺遣收誕兵卒至左右莫不驚散紹叔聞難獨馳赴焉誕死侍誕喪柩人咸稱之到京師司空徐孝嗣見而異之曰祖述之流也

北齊孫騰初爲高祖晉州長史高祖自晉陽出塗日行至襄垣尔朱兆率衆追高祖高祖與兆宴飲於水濱誓爲兄弟各還本營明旦兆復招高祖高祖欲安其意將赴之臨上馬騰牽衣止之兆乃隔水肆罵馳

還晉陽高祖遂東

綦連猛魏末爲爾朱兆都督猛父母兄弟皆在山東爾朱京纏欲投高祖謂猛曰王以爾父兄皆在山東每懷不信爾君不走今夜必當殺爾可走去猛以素蒙兆恩拒而不從京纏曰我今亦欲去爾從我不猛又不從京纏乃舉稍曰爾不從我必刺爾猛乃從之去城五十里卽背京纏復歸及爾朱兆敗乃歸高祖問曰爾朱京纏將爾投我爾中路背去何也猛乃具陳服事之理不可貳心高祖曰爾莫懼服事人法須如此遂補都督

慕容紹宗魏末爲爾朱兆長史兆之敗於韓陵也士卒多奔兆懼將欲潛遁紹宗建旗鳴角招集義徒軍容旣振與兆徐而上馬

後周周惠達幼有志操魏齊王蕭寶寅爲瀛州刺史召惠達及河間馮景同在閣下甚禮之及寶寅還朝惠達隨入雒陽領軍元叉勢傾海內惠達嘗因寶寅與叉言論叉歎重之於座遺惠達衣物孝昌初魏臨淮王彧北討以惠達爲府長流叅軍及萬俟醜奴等構亂蕭寶寅西征惠達復隨入關寶寅後與賊戰不利退還仍除雍州刺史令惠達使雒陽未還而寶寅

及謀聞於京師有司以惠達是其行人將執之乃私馳還至潼關遇大使楊侃侃謂惠達曰蕭氏逆謀已成何爲故入虎口惠達曰蕭王爲左右所誤今往庶其改圖及至寶寅反形已露不可彌縫遂用惠達爲光祿勳中書舍人寶寅旣敗人悉逃散唯惠達等數人從之寶寅語惠達曰人生富貴左右咸言盡節及遭厄難乃知歲寒也後爲賀拔岳關中大行臺從事中郎嘗使至雒魏孝武與惠達語及世難惠達陳天下事勢述岳有誠節唯以憂國定亂爲事言辭激切帝甚嘉之及還具以白岳岳曰人生於天受命於君

豈有利人榮祿而不憂其禍難卿之所奏實獲吾心自是更被親禮岳每征討嘗命惠達居守又轉岳府屬岳爲侯莫陳悅所害悅得惠達辭以疾不見許乃遁入漢陽之麥積崖

賈直言從事於李師道時師道不恭朝命直言呂刃說者二與觀說者一師道訖不從劉昌喬太原陽曲人少遊三蜀楊琳之亂昌喬說其歸順及琳授雒州刺史以昌喬爲從事琳死乃去馮宿爲徐州節度使張建封掌書記建封卒其子愔爲軍士所立淄清李師古欲乘喪襲取冀鎮時王武

俊且觀其鬻情恐懼計無所出宿乃以檄書招師古而說武俊曰張公與君爲兄弟欲同力驅兩河歸天子衆所知也今張公歿幼子爲亂兵所脅內則誠款隔絕於朝廷外則境土侵逼於強寇孤危若此公安得坐視哉誠能奏天子念先僕射之忠勲捨其子之迫脅使得束身歸闕公於朝廷有靖亂之功於張氏有繼絕之德矣武俊大悅卽以表聞繇是朝廷賜愔節仍贈建封司徒

蘇兆爲淮西吳少陽判官與陽元卿及其將侯惟清同爲少陽畫朝覲計及元濟自領軍事昏狠無知所

疆皆軍中凶悍之徒素不便兆等既不受詔其左右
皆兆等有異志元濟乃引兆於別寢縊殺之歸其屍
於家械侯惟清而囚之時朝廷聞清已死贈兵部尚
書贈兆以右僕射

後唐符習爲鎮州王鎔都較自莊宗經略河朔與鎔
連衡嘗令率師從征鎔爲大將軍王德明所害德明
據鎮州時習在德勝行臺德明上書請習歸藩莊宗
召習謂之曰王德明召爾歸藩自爲行計習兩泣而
進曰臣本趙人家世事王氏嘗効忠義而德明乃幽
滄叛卒趙王知人不盡過意任使果致此反嗟臣等

雖不武願在霸府血戰而死不能委身於兇首被其
屠割莊宗曰爾等旣懷舊君之愛則能復仇乎吾當
助爾習等舉身投地號動感激良久謝曰王必以故
使輔翼之勞雪其冤恥臣不敢期師旅爲助但悉本
軍可以誅其逆豎帝卽令闕寶史建塘助習興師討
德明乃以習爲鎮冀節度留後及德明誅將正授節
鉞習不敢當其任辭曰臣緣故使未葬無嗣息臣合
服斬衰候臣禮制畢聽命及莊宗兼領鎮州乃割相
衛二州置義寧軍以習爲節度使習奏曰魏博六州
霸王之府不宜遽有割隸但授臣河南一鎮臣自攻

九月元龜書忠十
取便也乃授天平軍節度鄆齊棗觀察東南面招討
等使習有器度性忠壯於荷恩感遇之際而能奮勵
思報自莊宗十年泆河拒戰左倚右角習嘗以本軍
景從心無顧望諸將服其爲人

淳于晏登州人以明經登第自霍彥威爲裨將日寄
食於門下彥威嘗敗獨脫其身左右莫繼唯晏仗劍
從之徒步草莽自是彥威高其氣義相得甚歡及歷
數鎮皆爲判官軍府之事咸取決焉至於私門簿籍
婢僕支分事無巨細但取決於晏幕下兼家宰之任
爾後公卿之門客徃徃效焉時謂之效淳俾彥威數

鎮稱治晏之盡心他人又不可階也

晉顏衍爲青州節度房知溫從事知溫貪暴積貨數
百萬治第於南城出則以妓樂相隨任意所之曾不
以政事爲務衍委曲陳其利病知溫不能用焉及高
祖建義入雒尚不卽進獻耀兵於牙帳之下衍正色
謂曰清泰帝富有天下多力善戰豈明公之比而天
運有歸坐成灰燼今青州遷延不貢何以求安千百
武夫無足爲恃深爲大王之所憂也知溫遂馳表稱
賀青州乃安未幾以沉湎成病而卒部曲將吏分其
所聚餽爲富室衍又勸其子彥儒進錢十萬貫以助

國用朝廷除彥儒爲沂州刺史其家幸獲保全皆衍之力也

漢李恕初仕後唐爲燕王趙延壽賓佐延壽陷虜十年朝廷不欲恕在朝出爲從事未幾虜犯京師延壽爲虜相輔復召恕委用會延壽子贊爲河中尹命恕往佐之其年虜主死高祖有中原移贊於京兆贊懼漢不能容潛通蜀軍將謀夜遁恕謂贊曰燕王入胡非所願也漢朝建國必務懷來太尉泥首歸朝必保富貴今若狼狽入蜀理難萬全所謂蹄涔不能容吞舟之魚後悔無及願公歸漢其福萬全苟聽卑言請

先入朝爲公申理即命恕上章高祖引見謂恕曰贊何以附西川軍恕曰贊以家在胡中身受胡命自懷憂恐謂陛下終不能容招引川軍蓋圖苟免以微臣意必料國家撫安所以令臣哀祈請覲高祖曰贊父子皆吾人也事虜出於不幸今聞延壽落於檻穽吾不忍不容贊恕未還贊已離永興朝廷嘉恕之忠以爲邠州節度判官

周和凝仕梁爲滑州節度賀瓌賓幕時瓌與後唐莊宗相拒於河上戰於胡柳陂瓌軍敗而北唯凝隨之瓌顧曰無相隨當自努力凝對曰大丈夫受人知有

難不報非素志也但恨未有死所旋有一裨將來逐
環凝叱之不止遂引弓以射應弦而斃環復免既而
謂諸子曰昨非和公無以致此和公文武全才而有
志氣後必享重位爾宜謹事之遂以女妻之繇此聲
望益隆

王敏仕晉為杜重威數鎮從事漢初重威叛于鄴時
敏為留守判官嘗泣諫重威懇請歸順重威始則不
從及其窮也納敏之言以其城降時魏之饑民十猶
四五咸保其餘生者敏之力也

册府元龜

册府元龜

淮南李嗣京叅閱

西極文翔鳳訂正

豫章黃國琦較釋

幕府部

十一

辟署

漢氏公卿郡守皆得自舉其屬中興之後辟召尤盛
故當時幕府彬彬然多賢才焉魏晉而下內居宰弼
之任外膺將領之寄者曷嘗不選衆而舉得人為盛
哉蓋夫藩輔之重安危注意綱紀之職左右惟人故

能參贊於策畫經綸於政務藹蒞官之嘉績昭治戎之善志周旋翊佐以成其美焉至乃羔鴈之贄璧馬之聘蓋所以致禮才彥將其厚意然而宣尼有擇木之喻展禽懷枉道之耻若夫含忠履潔之士非志義相期而用舍同趣又豈肯屈身而苟合哉

漢倪寬爲廷尉從史之北地視畜數年還至府上畜簿會廷尉時有疑奏已再見卻矣掾史莫知所爲寬爲言其意掾史因使寬爲奏成讀之皆服以日廷尉湯湯大驚召寬與語乃奇其材以爲掾湯繇是鄉學以寬爲奏讞掾甚重之及湯爲御史大夫以寬爲掾

蕭望之署小苑東門候免歸爲郡吏御史大夫魏相

除望之爲屬

尹翁歸河東人太守田延年除補卒吏案事發姦窮竟事情延年大重之自以能不及翁歸徙署郵督

薛廣德字長卿蕭望之爲御史大夫除廣德爲屬數

與論議噐之

馮奉世以選爲郎前將軍韓增奏以爲軍司空令本始中從軍擊匈奴軍罷復爲郎

陳湯免射聲較尉大將軍王鳳奏以爲從事中郎幕府事盡決於湯

王尊涿郡人給事太守府問詔書行事尊無不對太守奇之補除書佐署守屬監獄久之稱病去復召署守屬治獄爲郡決曹

詔葛豐字少季以明經爲郡文學名特立剛直貢禹爲御史大夫除豐爲屬舉侍御史

孫寶潁川人以明經爲郡吏御史大夫張忠辟寶爲屬欲令授子經更爲除舍設儲侍寶自劾去忠固還之心內不平後署寶主簿寶徙入舍祭竈請比儻忠陰察怪之使所親問寶前大夫爲君設除大舍子自劾去者欲爲高節也今兩府高士俗不爲主簿子旣

爲之徙舍甚說何前後不相副也寶曰高士不爲主簿而大夫若以寶爲可一府莫言非士安得獨自高前日君男欲學文而移寶自近禮有來學義無往教道不可詘身詘何傷且不遭者可無不爲况主簿乎忠聞之甚慙

侯文京兆故吏剛直不苟合嘗稱疾不肯仕孫寶爲京兆尹以恩禮請文欲爲布衣友日設酒食妻子相對文求署爲掾進見如賓禮數日以立秋署文東部督郵

厚涉字巨先父爲南陽太守父死涉還南陽賻送行

喪塚廬三年繇是顯名京師禮畢扶風謁請為議曹
陳咸為御史中丞頗言石顯短後坐事減死髡為城
旦因廢成帝初即位大將軍王鳳以咸前指言石顯
有患直節奏請咸補長史

杜欽延年子也王鳳以外戚輔政求賢以自助鳳父
頃侯禁與欽兄緩相善故鳳深知欽能奏請欽為大
將軍武庫令職閒無事欽所好也

谷永為長安小吏博學經書建昭中御史大夫繁延
壽聞具有茂材除補屬舉為太常丞

杜鄴以病去郎王商為大司馬衛將軍除鄴以為腹

心舉侍御史

母將隆字君房王音為大司馬車騎將軍內領尚書

外典兵馬踵故選置從事中郎

踵猶躡也言承躡故事也

與參謀

議奏請隆為從事中郎

後漢卓茂初辟丞相府史事孔光稱為長者

董均建武中舉孝廉司徒府博通古今數言政事

魯恭扶風平陵人十五與弟丕俱居大學兄弟俱為

諸儒所稱恭憐弟丕小欲先就其名託疾不仕郡舉

丕方正恭始為郡吏大傅趙熹聞而辟之

尹敏待詔公車拜郎中辟大司空府

吳良齊國人初爲郡吏歲旦與掾史入賀門下掾王望舉觴上壽誥稱太守功德良勃然責之太守歛容而止轉良功曹耻以言受進終不肯謁時驃騎將軍東平王蒼聞而辟之署西曹甚相敬愛

董宣初爲司徒侯霸所辟舉高第累遷北海相

鮑永字君長上黨人父宣哀帝時任司隸較尉爲王莽所殺永爲郡功曹莽以宣不附已欲滅其子孫都尉路平承望風旨規欲害永太守苟諫擁護召以爲吏嘗置府中諫卒永自送喪歸扶風平遂收永弟升新太守趙興到聞乃歎曰我受漢茅土不能立節而

鮑宣死之豈可害其子也勅縣出升復署永功曹

周澤建武末辟大司馬府署議曹祭酒數月徵試博

士

衛颯字子產建武二年辟大司徒鄧禹府舉能案劇

除侍御史

王景少學易沈深多伎藝辟司徒伏恭府
崔駰善屬文竇憲爲車騎將軍辟駰爲掾憲府貴重掾屬三十人皆故刺史二千石唯駰以處士年少擢在其間及憲遷大將軍復以傳毅爲司馬班固爲中護軍憲府文章之盛冠於當世

杜篤字季雅車騎將軍馬防擊西羌請為從事中郎將戰歿於射姑山

第五倫京兆長陵人京兆尹閻興召倫為主簿

樂恢京兆長陵人為郡功曹辟司空牟融府

何敞扶風平陵人元和中辟太尉宋繇府繇待以殊

禮

胡廣南郡人六世祖剛清高有志節平帝時大司徒馬宮辟之

桓榮字春卿少習歐陽尚書教授江淮間年六十餘始辟大司徒府

張興辟司徒馮勤舉孝廉稍遷博士
楊震字伯起鄧隲為大將軍屬人士荒饑死者相望盜賊羣起四夷侵畔隲崇節儉罷力役辟震與朱寵陳禪置之幕府故天下復安

朱穆字公叔舉孝廉屬江淮盜賊羣起州郡不能禁或說大將軍梁冀曰朱公叔才兼文武海內奇士若以為謀主賊不足平也冀亦素聞穆名乃辟之使典兵事甚見親任

劉寬字文饒桓帝時大將軍辟五遷司徒長史
也 冀 大將 軍梁

應奉爲武陵太守坐公事免延熹中武陵蠻復寇亂
荊州車騎將軍馮緄以奉有威恩爲蠻夷所服上請
與俱征拜從事中郎奉勤設方略賊破軍罷緄推功
於奉薦爲司隸較尉

馬融字季長大將軍鄧騭聞融名召爲舍人非其好
也遂不應命客於涼州武都漢陽界中會羌虜颺起
邊方擾亂菜穀踴貴自關以西道殣相望融旣饑困
乃悔而歎息謂其友人曰古人有言左手據天下之
圖右手刎其喉愚夫不爲所以然者生貴於天下也
今以世俗咫尺之蓋滅無賞之軀殆非老莊所謂也

故徃應騭召

周舉字宣光初辟司徒李郤府後爲蜀郡太守坐事
免大將軍梁商表爲從事中郎甚重焉

黃昌字聖真會稽餘姚人曉習文法仕郡爲決曹史
行部見昌奇之辟從事

杜喬字叔榮少爲諸生舉孝廉辟司徒楊震府

李膺初舉孝廉爲司徒胡廣所辟高第遷青州刺史

杜密爲人沈躡少有厲俗志爲司徒胡廣所辟

魏朗詣太學受五經京師長者李膺之徒爭從之辟
司徒府再遷彭城令

范滂汝南人爲光祿主事棄官而去後爲太尉黃瓊所辟

巴肅爲具丘長辭病去辟公府

羊陟少清直有學行舉孝廉辟太尉李固府

張儉山陽人初舉茂材以刺史非其人謝病不起太守崔超請爲東部督郵

岑暉南陽人雖在閭里慨然有董正天下之志太守弘農成瑨下車欲振威嚴聞暉高名請爲功曹

陳翔少名知察孝廉太尉周景辟高第拜侍御史

何顥字伯求黨事起變名姓亡匿事解辟司空府

黃尚爲蜀郡太守免大將軍梁商表爲從事中郎特甚敬重

陳蕃汝南人周景爲豫州刺史辟爲別駕又辟潁川李膺荀緄杜密沛國朱寓爲從事皆天下英俊之士也

史弼字公謙少篤學聚徒數百人州郡辟公府

童恢琅琊人少仕州郡爲吏司徒楊賜聞其執法廉平乃辟之

王允太原人仕郡爲吏人有路佛者少無名行而太守王球召以補吏允犯顏固爭球怒收允欲殺之刺

史鄧盛聞而馳傳辟爲別駕從事允繇是知名而路佛以之廢棄允後爲冀州刺史辟荀爽孔融等爲從事

虞詡字升卿早孤祖母終服闋辟太尉李修府拜郎中

邊讓字文禮初大將軍何進聞讓才名欲辟命之恐不至詭以軍事徵召旣到署令史進以禮見之讓善占謝能辭對賓客兩堂莫不羨其風采

趙岐字邠卿辭司空掾後爲大將軍梁冀所辟爲陳損益求賢之策冀不納舉理劇爲皮氏長避仇逃難

四方藏北海孫嵩家複壁中後因赦出三府聞之同時並辟九年乃應司徒胡廣之命

盧植涿郡人爲尙書免官隱於上谷不交人事冀州牧袁紹請爲軍師蔡邕辟司徒喬玄府甚敬待之出補河平長

孔融辟司徒楊賜府會河南尹何進當遷爲大將軍賜遣融奏謁賀進不時通融卽奏謁還府投劾而去河南官屬耻之私遣劍客欲追殺融客有言於進曰孔文舉有重名將軍若造怨此人則四方之士引領而去矣不如因而禮之以示廣於天下進然之旣拜

而辟融高第爲侍御史

劉表初被訕議爲八顧詔書捕黨人亡走得免黨禁

解辟大將軍何進掾

鍾繇爲莒長委官還家初州牧陶謙初辟別駕從事

辭疾遜遁謙重令楊州從事會稽吳範宣音堅守意

不移欲威以刑罰然後乃起

魏夏侯惇字元讓太祖初起惇嘗爲裨將從征伐太

祖行奮武將軍以惇爲司馬

荀攸字公達爲漢尚書太祖素聞攸名與語大悅謂

荀彧鍾繇曰公達非嘗人也吾得與之計事天下當

何憂哉以爲軍師

國淵字子尼樂安人與邴原管寧等避亂遼東旣還

舊土太祖辟爲司空掾

王修字叔治北河營陵人初平中北海相召以主簿

表譚在青州辟爲治中從事別駕表紹又辟修除即

墨令後復爲譚別駕表氏政寬在職者多蓄聚太祖

破鄴籍沒審配等家財物貨以萬數及破南皮闔修

家穀不滿十斛書數百卷太祖歎曰士不妄有名乃

禮辟爲司空掾行司金中郎將

邴原字根矩北海朱虛人在遼東一年後太祖辟爲

司空掾

又云孔融在北海以鄭玄為計掾彭璆為計吏邴原為計位

管寧字幼安避亂於遼東太祖辟為司空掾

崔琰字季珪清河人就鄭玄學會黃巾賊起去家四

年乃歸以琴書自娛太將軍表紹聞而辟之太祖破

袁氏領冀州牧辟琰為別駕從事

徐奕字季才東莞人避難江東孫策禮命之奕改姓

名微服還本郡太祖為司空辟為掾屬

何夔字叔龍陳郡人避亂淮南不應表術辟開行道

本郡頃之太祖辟為司空掾

邢顒字子昂為廣宗長以故將喪棄官太祖更辟司

空掾除行唐令入為丞相門下督郵

鮑勛字叔業父信為濟北相協規太祖身以遇害太

祖為丞相追錄信功封勛兄邵新都亭侯辟勛丞相

掾

華歆字子魚為下邳令會天子使大傅馬日磾石安

集關東日磾辟歆為掾

郭嘉字奉孝太祖召見論天下事太祖曰使孤成大

事者必此人也嘉出亦喜曰真吾主也表為軍司空

董昭字公仁除瘦陶長相人令袁紹以為參軍事

劉華字子揚太祖辟為司空倉曹掾

劉放字子棄遭世大亂漁陽王松據其土往依之太祖克冀州劉放說松舉雍奴泉州安次以附之放爲松荅太祖書其文甚麗太祖既善之又聞其說繇是遂辟放與松俱至以放叅司空軍事

劉覆字元穎避亂楊州建安初說表術將戚寄秦翊使率衆與俱詣太祖太祖悅之辟爲司徒掾

王粲字仲宣漢末西京擾亂乃之荊州依劉表表卒粲勸表子琮令歸太祖太祖辟爲丞相掾後遷軍叅

謀祭酒

荀緜字公高少喜文學建安中召署軍謀掾

衛凱字伯儒少夙成以才學稱太祖辟爲司空掾屬

劉廙字恭嗣南陽人兄望之有名於世荊州牧劉表

辟爲從事後望之見害廙懼奔楊州遂歸太祖太祖

辟爲丞相掾屬轉五官將文學後徙署丞相倉曹屬

阮瑀字元瑜太祖雅聞瑀名辟之不應連見偪促乃

逃入山中太祖使人焚山得瑀送至以爲司空軍謀

祭酒管記室

范粲州府交辟皆無所就久之乃應命爲治中轉別

駕辟大尉掾

司馬朗字伯達年二十二太祖辟爲司空掾屬

賈逵字梁道除澠池令以祖父喪去官司空辟爲掾
徐邈字景山燕國人大祖平河朔召爲丞相軍謀掾
試守奉高令入爲東曹議令史

胡質字文德壽春人爲丞相東曹叅令史州請爲治
中人

王陵字彥雲稍遷至中山大守所在有治迹太祖辟
爲丞相掾屬

和洽字陽士汝南人太祖定荊州辟爲丞相掾屬

沐竝字德信爲人公果不畏疆禦丞相召署軍謀掾
裴潛字文行河東人避亂荊州劉表待以賓禮潛私

謂所親曰劉牧非霸王之才敗無日矣遂南適長沙

太祖定荊州以潛叅丞相軍事出歷三縣令入爲倉

曹掾屬

韓暨字公至南陽人避袁術命召徙居山都之山劉

表禮辟遂遁居孱陵界表深恨之暨懼應命除宜城

長太祖平荊州辟爲丞相士曹屬

高柔字文惠袁紹甥高幹之弟幹以并州叛太祖欲

因事誅之以爲刺姦令史柔夙夜匪懈至擁膝抱文

書而寢太祖嘗夜微出觀察諸吏見柔哀之徐解裘

覆柔而去自是辟爲丞相倉曹屬

孫禮字德達涿郡人太祖平幽州召爲司空軍謀掾
王觀字偉臺少孤貧厲志太祖召爲丞相文學掾

楊阜字義山天水人以州從事爲州牧韋端使詣許
拜安定長史非其好遂去官端徵爲大僕子康代爲

刺史辟阜爲別駕察孝廉辟丞相府州表留叅軍事
高堂隆字升平泰山人少爲諸生太守薛悌命爲督

郵後去吏避地濟南太祖召爲丞相軍謀掾
蒲寵字伯寧山陽人守高平令棄官歸太祖臨兖州

辟爲從事及爲大將軍辟署西曹屬
田豫字國讓漁陽人公孫瓚敗而鮮于輔爲國人所

推行太守事以豫爲長史豫謂輔曰終能定天下者

曹氏也宜速歸命輔從其計太祖召豫爲丞相軍謀
掾

牽招字子經安平人冀州牧袁紹辟爲督軍從事兼
領烏丸突騎太祖領冀州辟爲從事

杜夔字公良避亂奔荊州荊州降太祖以夔爲軍謀
祭酒叅大樂事

郭淮字伯濟文帝爲五官將召署門下賊曹轉丞相
兵曹議令史

鄧艾字士載義陽人爲典農綱紀上計吏因使見太

尉司馬宣王宣王奇之辟之為掾

管輅字公明平原人清河太尉華表召為文學掾安
平趙孔曜薦輅於冀州刺史裴徽徽辟為文學從事
引與相見大善友之徙部鉅鹿遷治中

傅嘏字蘭石弱冠知名司空陳羣辟為掾

胡遵安定人張既為雍涼二州刺史與天水楊之阜
酒泉龐涓燉煌張恭周生烈等為既所禮辟終皆有
名位

張遼少為郡吏漢末并州刺史丁原以遼武力過人
召為從事使將兵詣京都

單固字恭夏山陽人為人有器識正始中交州刺史
令狐愚與固父伯龍善辟固欲以為別駕固不樂為
州吏辭以疾愚禮意愈厚固母夏侯氏謂固曰使君
與汝父父善故命汝不止汝亦固當仕進自可往耳
固不獲已遂往

虞松字叔茂陳留人弱冠有才從司馬宣王征東宣
王命作檄及破賊作露布松從宣還宣王辟為掾時
年二十四

蜀周羣字仲直巴西閬中州牧劉璋辟為師友從事
劉琰字威碩魯國人先主在豫州辟為從事以其宗

姓有風流善談論厚親待之遂隨從周旋嘗爲賓客
劉巴字子幼零陵人曹公征荊州辟爲掾使招納長
沙零陵桂陽會先主略有三郡巴不得反使遂遠適
交趾先主深以爲恨巴復從交趾至蜀俄而先主定
益州巴辭謝罪負先主不責而諸葛孔明數稱薦之
先主辟爲左將軍西曹掾

龐統字士元襄陽人郡命爲功曹先主治荊州以從
事守耒陽令在縣不任免官吳將魯肅遺先主書曰
龐士元非百里才也使處治中別駕之任始當展其
驥足耳諸葛亮亦言之先主先主見與善譚大器之

以爲治中從事

糜竺字子仲東河人徐州牧陶謙辟爲別駕從事後
曹公表竺領羸郡太守去官隨先主周旋先主將適
荊州遣竺先與劉表相聞以竺爲左將軍從事中郎
孫乾字公祐北海人先主領徐州辟爲從事後隨從

周旋

簡雍字憲和少與先主有舊隨從周旋先主至荊州
雍與糜竺孫乾同爲從事中郎

伊籍字機伯隨先主南渡江從入益州益州定以爲
左將軍從事中郎

秦宓字子勅廣漢人先主定益州廣漢太守夏侯纂請為師友祭酒領五官掾稱曰仲父益州辟宓從事祭酒建興二年丞相亮領益州牧選宓迎為別駕董和字幼宰劉璋以為益州太守先主定蜀徵為掌軍中郎將

馬良字季常先主領荊州辟為從事先主入蜀辟良左將軍

廖立字公淵先主領荊州牧辟為從事年未三十

楊儀字威公襄陽人太守關羽命為功曹奉使詣先主先主大悅之辟為左將軍兵曹掾後為遷署弘農

太守丞相亮以為參軍署府事遷長史

費詩字公舉犍為人先主領益州以為督軍從事

杜瓊字伯瑜益州牧劉璋辟為從事先主定益州以為議曹從事

尹默字思潛梓潼人先主定益州以為勸學從事

譙周字允南巴西人丞相亮領益州牧命為勸學從事大將軍

黃權字公衡巴西人少為郡吏州牧劉璋召為主簿李恢字德昂建寧人先主領益州牧以為公曹書佐

主簿更遷別駕從事

蔣琬字公琰諸葛亮爲丞相開府辟琬爲東曹掾舉
茂材琬固讓劉邕陰化龐延廖淳亮教答曰思惟背
親捨德以殄百姓衆人旣不隱於心實又使遠近不
解其義是以君宜顯其功舉以明此選之清重也遷
爲叅軍又代張裔爲長史
姚佃字子緒爲廣漢太守丞相亮北駐漢中辟爲掾
並進文武之士亮稱曰忠益者莫大於進人進人者
各務其所向今姚掾並存剛柔以廣文武之用可謂
博雅矣願爲掾各希此事以屬其望遷爲叅軍
霍弋字紹先先主末年爲太子舍人後主踐祚除弋

者丞相諸葛亮北臨漢中請爲記室使與子喬共周
旋游處
姜維天水冀人爲中郎叅本郡軍事丞相諸葛亮軍
向祁山時天水太守適出案行維及功曹梁緒主簿
尹賞主記梁處等從行太守聞蜀軍隨至而諸縣響
應疑維等皆有異志於是夜亡保邽維等覺太守去
追遲至城門城門已閉不納維等相率還冀冀亦不
入維維等乃俱詣諸葛亮會馬謖敗於街亭亮拔將
西縣千餘家及維等還故維遂與母相失亮辟爲倉
曹掾加奉義將軍封當陽亭侯

吳張昭字子布孫策創業命爲長史

程秉字德樞避亂交州士燮命爲長史

朱治字君理丹陽故鄣人初爲縣吏後察孝廉州辟

從事

虞翻字仲翔會稽人太守王朗命爲功曹孫策征會

稽翻勸朗避策策後命爲功曹待以交友之禮

陸績字公紀大帝統事辟爲奏曹掾以直道見憚出

爲鬱林太守

駱統字公緒大帝以將軍領會稽太守統年二十試

爲烏程相民戶過萬咸歎其惠理帝嘉之召爲功曹

行騎都尉

吾粲字孔休孫河爲將軍表粲爲曲河丞遷爲長史

大帝爲車騎將軍召爲主簿

全柔吳郡錢塘人漢靈帝時補尚書郎右丞董卓之

亂棄官歸州辟別駕從事後爲丹陽都尉大帝爲車

騎將軍以柔爲長史

潘濬字承明武陵人年三十荆州牧劉表辟爲部江

夏從事先主領荊州以爲治中從事

胡綜字備則大帝爲討虜將軍以綜爲金曹從事

步騭字子山大帝爲討虜將軍召騭爲主記除海鹽

長選辟車騎將軍東曹掾

帝為徐州牧以騰為治中從事舉茂才

顧徽字子欽少游學有唇吻大帝統事聞徽有才辯

召署主簿

闕澤字德潤究覽羣籍兼通曆數大帝為驃騎將軍

辟補西曹掾

聶支有唇吻少為縣吏虞翻徙交州縣令使支送之

翻與語而奇焉為書與豫章太守謝斐令以為功曹

郡時見有功曹斐見之間曰縣吏聶支可堪何職對

曰此人縣間小吏耳猶可堪曹佐斐曰論者以為宜

作功曹君其避之乃用為功曹

徐平字伯先諸葛恪為丹陽太守討山越以平威重

思慮可與效力請平為丞

晉王祥漢末遭亂攜弟覽避地廬江三十餘年徐州

刺史呂虔檄為別駕祥年垂耳順固辭不受覽勸之

為具車牛祥乃應召虔委以州事

王覽字玄通祥之弟也名亞於祥應本郡之召稍遷

司徒西曹掾

魯芝扶風郡人辟州別駕魏車騎將軍郭淮為雍州

刺史深敬重之舉孝廉除郎中會丞相諸葛亮攻隴

右淮復請芝為別駕從事

王況好書善屬文大將軍曹爽辟爲掾

鄧殷亮直強正鍾會代蜀奇其才自黽池令召爲主簿賈克伐吳請殷爲長史

劉毅僑居平陽太守杜恕請爲功曹後辟司隸從事太常鄭袤舉博士文帝辟爲相國掾辭疾積年不就時人謂毅忠於魏氏而帝怒其顧望將加重辟毅懼應命轉主簿

裴秀字季彥度遼將軍母丘儉嘗薦秀於大將軍曹爽爽乃辟爲掾

唐彬魯國鄒人初爲郡門下掾累遷別駕彬忠肅公

亮盡規扶救不顯諫以自彰又奉使詣相府計事于時僚佐皆當世英彥見彬莫不欽悅稱之於文帝薦爲掾屬帝以問其叅軍人皆切忌其能良久不答陳騫在坐歛板而稱曰彬之爲人勝騫甚遠帝笑曰但能如卿固未易得何論於勝因辟彬爲鎧曹屬帝問曰卿何以致辟對曰修業陋巷觀古人之遺迹言滿天下無口過行滿天下無怨惡帝顧四坐曰名不虛行他日謂孔顥曰近見唐彬卿受蔽賢之責矣

裴楷字叔則鍾會薦之於文帝辟相國掾

荀勗字公曾仕魏辟大將軍曹爽掾

荀邃字道玄弱冠辟趙王倫相國掾

荀闔字道明有名稱大司馬齊王冏辟爲掾

荀組字大章爲滎陽太守趙王倫爲相國欲收大名
選海內德望之士以江夏李重及組爲左右長史東
平王堪沛國劉謨爲左右司馬

韓壽字德真美姿貌善容止賈克辟爲司空掾

李熹字季和宣帝辟爲大傅屬固辭疾郡縣扶輿上
道

王渾字玄冲雅有噐量魏世辟大將軍曹爽掾

王睿字士治弘農人州辟部河東從事守令有廉潔

者皆望風自引而去

山濤字巨源河內人年四十始爲郡主簿功曹上計

掾州辟部河南從事

郭舒順陽人刺史夏侯含辟爲西曹轉主簿含坐事

舒自繫含事得釋刺史宗岱命爲治中喪母去職劉

弘收荊州引爲治中弘卒王澄代之聞其名引爲別

駕後轉順陽太守王敦召爲參軍從事中郎

樂廣字彥輔裴楷薦廣於賈克遂辟太尉掾

溫羨字長卿少以朗寤見稱齊王攸辟爲掾選尚書

郎

程衛字長玄強正方嚴劉毅聞其名辟爲都官從事
奏中護軍羊琇陰私所犯狼藉繇是名振遐邇遂辟
公府掾

何攀字惠興蜀郡人任州爲主簿王濬爲益州辟爲
別駕

劉頌字子雅少能辨物理爲時人所稱察孝廉舉秀
才不就文帝辟爲相府掾

傅敷字穎根清淨有道素解屬文永嘉之亂避地會
稽元帝引爲鎮東從事中郎

向雄字茂伯河內人太守劉毅嘗以非罪笞雄及吳

奮代毅爲太守又以少謹繫獄司隸鍾會於獄中辟
雄爲都官從事

阮籍字嗣宗太尉蔣濟聞其有雋才而辟之籍詣都
亭奏記曰伏惟明公以含一之德據三台之位英豪
翹首俊賢抗足開府之日人人自以爲掾屬辟書始
下而下走爲首昔子夏在西河之上而文侯擁篲鄒
子處黍谷之陰而昭王陪乘夫布衣常帶之士孤居
特立王公大人所以禮下之者爲道存也今籍無鄒
卜之道而有其陋猥見採擢無以稱當方將耕於東
臯之陽輸黍稷之稅適當塗者之路負薪疲病足力

不彊補吏之召非所克堪乞廻謬恩以光清舉初濟恐籍不至得記欣然遣卒迎之而籍已去濟大怒於是鄉親共喻之乃就吏宣帝爲大傅命爲從事中郎又爲景帝大司馬從事中郎文帝輔政以爲大將軍從事中郎籍後遺落世事雖去佐職嘗遊府內朝宴必與焉

阮瞻字千里見司徒王戎戎問曰聖人貴名教老莊明自然其旨同異瞻曰將無同戎咨嗟良久即辟之時人謂之三語掾

阮孚字遙集初辟大傅府遷騎兵屬避亂渡江元帝

以爲安東叅軍轉丞相從事郎中終日酣縱嘗爲有司所糾帝每優容之

庾峻字山甫潁川人少好學有才思歷郡功曹舉計掾州辟從事

郭象字子玄少有才理辟司徒掾稍至黃門侍郎東海王越引爲大傅主簿甚見親委遂任職當權熏灼內外繇是素論去之

摯虞字仲治京兆人才學博通著述不倦郡檄主簿王接字祖游河東人爲郡主簿迎太守温字宇奇之轉功曹史州辟部平陽從事泰山羊亮爲平陽太守

薦之於司隸較尉王堪出補都官從事

郤詵字廣基爲議郎母憂去職召爲征東參軍

華譚字令思廣陵人爽慧有口辯爲隣里所重揚州

刺史周凌引爲從事史愛其才噐待以賓友之禮建

興初元帝命爲鎮東軍諮祭酒轉丞相軍諮

陸機字士衡太康末入雒張華薦之諸公大傳楊駿

辟爲祭酒

陸雲字士龍吳郡人刺史周駿召爲從事謂人曰士

龍當今之顏子也

潘岳字安仁少以才穎見稱早辟司空大尉府

江彩字思玄陳留人本州辟舉秀才平南將軍溫嶠

以爲參軍後爲州別駕辟司空郗鑿掾除長山令鑿

又請爲司馬轉黃門侍郎車騎將軍庾冰鎮江州請

爲長史冰薨庾翼以爲諮議參將軍俄而復補長史

江淳字思悅蘇峻之亂避地東陽山大尉郗鑿檄爲

交州治中又辟大尉掾康帝爲司徒亦辟爲征西將

軍庾亮請爲儒林參軍

孫楚字子荆參鎮東石苞軍事苞表楚訕毀時政湮

廢積年征西將軍扶風王駿與楚舊好起爲參軍

孫綽字興公除著作佐郎征西將軍庾亮請爲參軍

後遷尚書郎揚州刺史殷浩以爲建威長史會稽王
羲之引爲右軍長史
羅尚字敬之荊州刺史王戎以尚及劉喬爲參軍並
委任之

趙誘字元孫淮南人世以將顯州辟主簿刺史鄒隆
爲其下所害誘還家杜門不出右將軍王敦以爲參
軍

周訪字士達汝南人察孝廉除郎中上甲令皆不之
官元帝渡江命參鎮東軍事

周撫字道和元帝辟爲丞相掾父喪去官後除武昌
太守王敦命爲從事中郎將咸和初司徒王導以爲
從事中郎

皇甫商秦州刺史重之弟齊王冏輔政以商爲參軍
冏誅長沙王乂以爲參軍
李含字世容隴西人州以短檄召爲門亭長刺史郭
奕素聞其賢下車擢爲別駕處群僚之右尋薦之公
府大保衛瓘辟爲掾
索靖字幼安燉煌人州辟別駕舉賢良方正其二
賈疋字彥度初辟公府遂歷顯職

荀晞字道將少爲司隸部從事累遷平陽太守齊王

冏輔政晞叅冏軍事冏誅坐免長沙王又爲驃騎將
軍以晞爲從事中郎

祖納有操行性至孝平北將軍王敦聞之遺其二婢
辟爲從事中郎有戲之曰奴價倍婢納曰百里奚何
必輕於五羖皮耶

范汪弱冠至京屬蘇峻作難汪乃遁逃西歸庾亮温
嶠克兵尋陽汪勸嶠等急宜進討是日護軍平南二
府禮命交至始解褐叅護軍軍事

册府元龜

命汪爲從事中郎

